

**Al-Xorazmiy universitetiga 2026/2027 o‘quv yili uchun magistratura
mutaxassisliklariga talabalarni qabul qilish tartibi to‘g‘risida**

NIZOM

1-bob. Umumiy qoidalar

1. Mazkur Nizom O‘zbekiston Respublikasi Prezidentining “Al-Xorazmiy universitetini tashkil etish hamda axborot texnologiyalari sohasida kadrlar tayyorlash tizimini yanada takomillashtirish chora-tadbirlari to‘g‘risida”gi 2025-yil 30-apreldagi PQ–160-son qarori hamda Al-Xorazmiy universiteti Kuzatuv kengashi yig‘ilishining 2026-yil 16-yanvardagi 6-sonli bayoniga muvofiq ishlab chiqilgan.

2. Mazkur Nizom Al-Xorazmiy universitetiga (keyingi o‘rinlarda – Universitet) 2026/2027 o‘quv yilining magistratura bosqichiga kirish uchun hujjatlarni topshirish, ularni ko‘rib chiqish va qabul qilish, shuningdek hujjatlari qabul qilingan talabgorlar orasidan belgilangan tartibda iqtidorli yoshlarni saralab olish hamda o‘qishga qabul qilish tartibini belgilaydi.

3. Mazkur Nizomda quyidagi asosiy tushunchalar qo‘llaniladi:

talabgor – Universitetning magistratura bosqichiga kirish istagida bo‘lgan abituriyent;

Qabul komissiyasi – Universitet rektorining tegishli buyrug‘i bilan tashkil etilgan, belgilangan vakolatlari doirasida talabgorlarning hujjatlarini topshirish va qabul qilish, ko‘rib chiqish hamda ular orasidan iqtidorli yoshlarni saralash va o‘qishga qabul qilish jarayonlarini muvofiqlashtiruvchi kollegial organ;

Ishchi guruh – Qabul komissiyasi huzurida tashkil etilgan, belgilangan vakolatlari doirasida talabgorlarning hujjatlarini topshirish va qabul qilish, ko‘rib chiqish hamda ular orasidan iqtidorli yoshlarni saralash va o‘qishga qabul qilish jarayonlarini olib boruvchi guruh;

“Admission Portal” elektron platformasi (keyingi o‘rinlarda – Elektron platforma) – Universitet tomonidan talabgorlarning hujjatlarini topshirish va qabul qilish, ko‘rib chiqish hamda ular orasidan iqtidorli yoshlarni saralash va o‘qishga qabul qilish jarayonlarini tizimlashtirish uchun maxsus ishlab chiqilgan elektron platforma;

kafolat to‘lovi – talabalikka tavsiya etilgan talabgor tomonidan uning Universitetda o‘qish joyini band qilish uchun joriy etilgan to‘lov;

shartli oferta – kafolat to‘lovini to‘lash uchun talabgorga Universitet tomonidan taqdim etiladigan to‘lov hujjati.

4. Hujjatlarni topshirish, ularni ko‘rib chiqish va qabul qilish, saralash hamda

o'qishga qabul qilish ushbu Nizomning 1-ilovasida keltirilgan sxemaga muvofiq amalga oshiriladi.

Bunda, barcha jarayon teng huquqlilik, adolat va shaffoflik tamoyillari asosida tashkil etilishi shart.

5. Universitetga o'qishga qabul qilish belgilangan tartibda tasdiqlangan talabalarni qabul qilish parametrlari doirasida, ushbu Nizomga muvofiq amalga oshiriladi.

6. Xorijiy fuqarolarni o'qishga qabul qilish bo'yicha har bir holat Qabul komissiyasi tomonidan alohida ko'rib chiqiladi hamda belgilangan talabalarni qabul qilish parametrlari doirasidan tashqarida qabul qilinadi.

7. Talabgor belgilangan tartibda tasdiqlangan talabalarni qabul qilish parametrlari bo'yicha faqat bitta magistratura mutaxassisligi uchun hujjatlarni topshirishi mumkin.

Bir yillik magistratura mutaxassisligiga hujjat topshirgan talabgor 2026/2027 o'quv yili boshlanishining birinchi 2 (ikki) ish kuniga qadar, ikki yillik magistratura mutaxassisligiga hujjat topshirgan talabgor esa 2026/2027 o'quv yili uchun hujjat topshirish yakuniga qadar magistratura mutaxassisligini o'zgartirish yuzasidan Elektron platforma orqali murojaat qilish huquqiga ega bo'ladi.

Bunda, o'zgartirish so'ralgan magistratura mutaxassisligida belgilangan tartibda tasdiqlangan talabalarni qabul qilish parametrlari doirasida qabul qilish imkonini mavjud bo'lishi lozim.

2-bob. Hujjatlarni topshirish, ularni ko'rib chiqish va qabul qilish

1-§. Hujjatlarni topshirish

8. Hujjatlarni topshirish 2026-yil 30-martdan boshlanib, 2026-yil 21-avgust yakunlanadi.

Yakunlash muddati talabgorlar soni va murojaatidan kelib chiqib, Qabul komissiyasi tomonidan o'zgartirilishi mumkin.

9. Talabgor hujjat topshirishda quyidagi talablarga muvofiq bo'lishi lozim:

kunduzgi va kechki oliy ta'lim muassasasini tamomlagan yoki tamomlash arafasida (oxirgi bosqichida ta'lim olayotgan) bo'lishi;

ingliz tilini kamida "Common European Framework of Reference" (CEFR) shkalasi bo'yicha "B2" darajada bilishi.

10. Hujjatlarni topshirish onlayn tarzda Elektron platforma orqali amalga oshiriladi.

11. Talabgor hujjatlarni topshirishdan avval Elektron platformada o'zining shaxsiy ma'lumotlarini qabul jarayonida foydalanish va qayta ishlashga rozilik bildirishi lozim.

12. Talabgor hujjatlarni topshirishi uchun unga Elektron platformada shaxsiy kabinet ochiladi va talabgor o'zi to'g'risidagi so'ralgan ma'lumotlarni kiritadi.

13. Talabgor shaxsiy kabinetga quyidagi hujjatlarni elektron shaklini yuklashi lozim:

oliy ta'lim muassasasini tamomlaganligi to'g'risidagi rasmiy hujjat;

ushbu Nizomning 2-ilovasida qayd etilgan xalqaro sertifikat (keyingi o'rinlarda – Xalqaro sertifikat) (mavjud bo'lgan taqdirda);

ushbu Nizomning 3-ilovasida ko'rsatilgan ingliz tilini bilish darajasini tasdiqlovchi sertifikat. Bunda, bakalavr bosqichida ta'lim tili ingliz tili bo'lgan talabgor uchun ushbu hujjatni taqdim etish talabi tatbiq etilmaydi.

Hujjatlar topshirish vaqtida ushbu bandda ko'rsatilgan hujjatlar mavjud bo'lmasdan turib, hujjat topshirilganidan so'ng qo'lga kiritilgan bo'lsa, ushbu hujjatni yuklashning oxirgi muddati 2026-yil 5-sentabr hisoblanadi. Bunda, majburiy hisoblangan hujjat taqdim etilmagan taqdirda, talabgor o'qishga qabul qilinishiga yo'l qo'yilmaydi.

14. Elektron platformada talabgorning tegishli ma'lumotlari va surati integratsiya qilingan tizim orqali avtomatik ravishda yuklanadi. Agar tizimda avtomatik ravishda yuklanishi lozim bo'lgan ma'lumotlar yoki surat texnik sabablarga ko'ra yuklanmay qolgan taqdirda, talabgor tomonidan qo'shimcha yuklanishi kerak.

Bunda, surat 3,5sm x 4,5sm hajmda, "PNG" / "GIF" / "JPEG" / "JPG" formatda, rangli, 5 MBdan oshmagan hajmda, oxirgi 3 oy ichida suratga olingan, neytral yuz ifodasi hamda ko'zlar ochiq holda yelkalar ko'ringan bo'lishi lozim.

15. Hujjatlarni belgilangan muddatlarda, to'g'ri va sifatli topshirish bo'yicha mas'uliyat talabgor zimmasiga yuklatiladi.

2-§. Hujjatlarni ko'rib chiqish va qabul qilish

16. Topshirilgan hujjatlar Ishchi guruh tomonidan 5 (besh) ish kuni mobaynida ko'rib chiqiladi.

17. Topshirilgan hujjatlarning haqiqiyliги mavjud imkoniyatlardan kelib chiqqan holda tekshiriladi.

18. Topshirilgan hujjatlar Ishchi guruh tomonidan ko'rib chiqilganidan so'ng, talabgorga ko'rib chiqish natijalari (hujjatlar qabul qilinganligi yoki rad etilganligi) to'g'risida uning shaxsiy kabinetiga xabar yuboriladi.

19. Topshirilgan hujjatlarda kamchiliklar aniqlangan taqdirda, talabgor ushbu kamchiliklarni xabar yuborilgan vaqtdan boshlab 2 (ikki) ish kuni mobaynida bartaraf etishi shart, aks holda hujjatlar rad etiladi.

20. Topshirilgan hujjatlar rad etilganda, talabgorga hujjatlarni rad etish sabablari batafsil bayon etiladi.

21. Hujjatlarni rad etish uchun quyidagilar asos bo'ladi:

talabgor hujjatlarni topshirish muddatlari yakunlanganidan so'ng, hujjatlarni topshirgan taqdirda;

talabgorning xohishiga ko'ra;

qalbaki va soxta hujjatlar topshirilganligi aniqlanganda;

topshirilgan hujjatlar belgilangan talab normalariga javob bermaganda, shu jumladan topshirilgan hujjatlardagi yozuvlar, muhrdagi yozuvlar sifatsiz holda nusxalangan taqdirda;

talabgor hujjatlar topshirish talablariga mos kelmaganda.

22. Talabgor hujjatlari qabul qilinganidan so'ng, uning yozma va og'zaki murojaati asosida bekor qilinishi mumkin.

3-bob. Talabgorlarni saralash va reyting ro'yxatini shakllantirish

23. Talabgorlarni magistratura mutaxassisliklariga saralash topshirilgan hujjatlar asosida Ishchi guruh tomonidan amalga oshiriladi.

Bunda talabgor ushbu Nizomning 13-bandida belgilangan minimal talablarni bajargan bo'lishi lozim.

24. Talabgorlar tegishli magistratura mutaxassisligi bo'yicha saralash mezonlari asosida ko'rib chiqiladi hamda ular bo'yicha reyting ro'yxati shakllantiriladi.

25. Saralash jarayonida talabgorlarning bakalavr bosqichidagi ta'lim yo'nalishi, bakalavr bosqichida ta'lim tili ingliz tili bo'lganligi, bakalavr bosqichidagi o'zlashtirish ko'rsatkichlari (GPA), ingliz tilini bilish darajasi, mavjud xalqaro sertifikatlari hamda tegishli hollarda ish tajribasi inobatga olinadi.

Bunda:

“Amaliy sun'iy intellekt” magistratura mutaxassisligi bo'yicha talabgorning bakalavr bosqichini axborot texnologiyalari, kompyuter fanlari, dasturiy injiniring, sun'iy intellekt, ma'lumotlar tahlili (data science), amaliy matematika, statistika, fizika hamda ushbu sohalarga yaqin boshqa yo'nalishlar bo'yicha tamomlaganligi inobatga olinadi. Shuningdek, ushbu Nizomning 2-ilovasida ko'rsatilgan xalqaro sertifikatlarga ega talabgorlarga hamda bakalavr bosqichida ta'lim tili ingliz tili bo'lgan talabgorlarga ustunlik beriladi.

“Biznesni boshqarish (MBA)” magistratura mutaxassisligi bo'yicha talabgor istalgan bakalavriat ta'lim yo'nalishini tamomlagan bo'lishi mumkin. Bunda bakalavr bosqichida ta'lim tili ingliz tili bo'lgan talabgorlarga hamda biznes, menejment, iqtisodiyot, moliya yoki boshqa tegishli sohalarda ish tajribasiga ega talabgorlarga ustunlik berilishi mumkin.

“Amaliy lingvistika va TESOL” magistratura mutaxassisligi bo'yicha talabgor istalgan bakalavriat ta'lim yo'nalishini tamomlagan bo'lishi mumkin. Bunda bakalavr bosqichida filologiya yoki tilshunoslik (ingliz tili yo'nalishi) bo'yicha ta'lim olgan hamda bakalavr bosqichida ta'lim tili ingliz tili bo'lgan talabgorlarga ustunlik beriladi.

4-bob. Saralash natijalarini shakllantirish, e'lon qilish va o'qishga qabul qilish

26. Talabgorlarni saralash natijalari shakllantirilgan reyting ro'yxati asosida belgilanadi.

27. Saralash natijalari Qabul komissiyasi tomonidan hujjatlarni ko'rib chiqish yakunlanganidan so'ng 10 (o'n) ish kuni muddatda e'lon qilinadi.

28. Saralash natijalariga ko'ra talabalikka tavsiya etilgan talabgorlar soni belgilangan tartibda tasdiqlangan talabalarni qabul qilish parametrlari miqdoridan ko'p bo'lgan taqdirda ular shakllantirilgan reyting natijalariga ko'ra quyidagi tartibda ajratiladi:

parametr doirasida talabalikka tavsiya etilgan talabgorlar;

parametrdan tashqari talabalikka tavsiya etilgan talabgorlar.

Bunda talabgorlar o'rtasida teng ko'rsatkichlar kuzatilgan taqdirda ustunlik quyidagi ketma-ketlikda belgilanadi:

bakalavr bosqichida ta'lim tili ingliz tili bo'lgan talabgorga ustunlik beriladi;

ingliz tilini bilish darajasi yuqori talabgorga ustunlik beriladi. Bunda talabgorlar turli xil sertifikatga ega bo'lsa, ushbu Nizomning 4-ilovasiga asosan ingliz tilini bilish darajasi yuqori talabgorga ustunlik beriladi;

agar talabgorlarning ingliz tilini bilish darajasi ham teng bo'lsa, Qabul komissiyasi tomonidan qo'shimcha suhbat tashkil etilishi mumkin.

29. Parametrdan tashqari talabalikka tavsiya etilgan talabgorlar kutish ro'yxatiga kiritiladi.

30. Ishchi guruh saralash natijalari e'lon qilingan kundan boshlab 5 (besh) ish kuni mobaynida parametr doirasida talabalikka tavsiya etilgan talabgorga uning shaxsiy kabineti orqali shartli ofertani yuboradi.

31. Shartli oferta yuborilgan kundan boshlab 5 (besh) ish kuni mobaynida talabgor tomonidan Universitet hisob raqamiga 4 (to'rt) million so'm miqdorida kafolat to'lovi to'lanishi lozim. Mazkur miqdor talabgorlarning soni va murojaatidan kelib chiqib, Qabul komissiyasi qarori asosida o'zgartirilishi mumkin.

32. Kafolat to'lovi quyidagi holatlarda va muddatlarda qaytariladi:

talabgorga belgilangan tartibda 100 foizlik davlat granti taqdim etilganda – o'quv yili boshlanganidan so'ng 3 (uch) oy muddatda, bunda ushbu davrda talaba o'qishdan chetlashtirilgan holat mustasno;

talabgor unga joriy o'quv yili uchun belgilangan kontrakt-to'lov miqdorini ta'lim krediti asosida to'liq to'laganda. Bunda, talabgor Universitetga kafolat to'lovini qaytarib berish bo'yicha murojaat yo'llanganda – kontrakt-to'lovi miqdori Universitet hisob raqamiga to'liq to'langan va talabgorning kafolat to'lovini qaytarib berish bo'yicha murojaati kelib tushganidan so'ng 10 (o'n) ish kuni

muddatda;

kafolat to'lovi amalga oshirilganidan so'ng 10 (o'n) ish kuni mobaynida talabgor tomonidan kafolat to'lovini qaytarib berish bo'yicha murojaat yo'llanganda – kafolat to'lovini qaytarib berish bo'yicha murojaati kelib tushganidan so'ng 10 (o'n) ish kuni muddatda;

xotin-qizlarning to'lov-kontraktning bir qismi O'zbekiston Respublikasi Davlat budjeti mablag'lari hisobidan qoplab berilganda – kontrakt-to'lovi to'liq miqdorining bir qismi Universitet hisob raqamiga to'langan va talabgorning kafolat to'lovini qaytarib berish bo'yicha murojaati kelib tushganidan so'ng 10 (o'n) ish kuni muddatda;

bir mutaxassislikka 15 (o'n besh) nafardan kam talabgor talabalikka tavsiya etilishi natijasida o'qishga qabul amalga oshirilmaganda – magistratura mutaxassisligi uchun o'quv yili boshlanishining birinchi 10 (o'n) ish kuni mobaynida.

33. Kafolat to'lovi talabgorga u tomonidan ko'rsatilgan plastik kartaga qaytarib beriladi.

34. Talabgor kafolat to'lovini qaytarib berish bo'yicha murojaatni "admission@akhu.uz" elektron manziliga yuborishi va unda quyidagi ma'lumotlarni ko'rsatishi lozim:

a) talabgorning F.I.Sh.;

b) qaytarib berilishi lozim bo'lgan plastik karta bilan bog'liq quyidagi ma'lumotlar:

bank nomi;

bank tranzit hisob raqami; bank MFO;

bank STIR;

plastik karta hisob raqami.

Mazkur murojaatga qaytarib berilishi lozim bo'lgan plastik kartochka egasining pasport yoki ID-karta nusxasi ilova qilinishi lozim.

35. Mazkur Nizomning 32-bandida nazarda tutilgan hollardan tashqari qolgan barcha holatlarda to'langan kafolat to'lovi qaytarilmaydi.

36. Parametr doirasida talabalikka tavsiya etilgan talabgor belgilangan tartibda kafolat to'lovini amalga oshirmagan yoki o'z xohishiga ko'ra Universitetda o'qishni rad etgan taqdirda, ushbu talabgor parametr doirasida talabalikka tavsiya etilgan talabgorlar ro'yxatidan chiqarilib, uning o'rniga keyingi o'rinda turgan talabgor qo'yiladi va shu tariqa kutish rejimidagi talabgor parametr doirasida talabalikka tavsiya etilgan talabgorlar ro'yxatiga kiritiladi.

37. Ishchi guruh muntazam ravishda parametr doirasida talabalikka tavsiya etilgan talabgorlar ro'yxatini yangilab boradi hamda kutish rejimidan parametr doirasida talabalikka tavsiya etilgan talabgorlar ro'yxatiga kiritilgan talabgorga

o'sha kunning o'zida unga uning shaxsiy kabinetiga shartli ofertani yuboradi.

Bunda, ushbu talabgorga kafolat to'lovini to'lash uchun shartli oferta yuborilgan kundan e'tiboran 5 (besh) ish kun muddat beriladi.

38. Parametr doirasida talabalikka tavsiya etilgan talabgor belgilangan tartibda kafolat to'lovini amalga oshirmagan yoki o'z xohishiga ko'ra Universitetda o'qishni rad etganidan so'ng, qayta parametr doirasida talabalikka tavsiya etilgan talabgorlar ro'yxatiga kiritish yuzasidan murojaat qilsa, bo'sh o'rinlar mavjudligidan kelib chiqqan holda talabalikka tavsiya etilgan talabgorlar ro'yxatiga qabul qilinishi mumkin.

39. Ishchi guruh magistratura mutaxassisligi uchun o'quv yili boshlanishining birinchi 5 (besh) ish kuni mobaynida parametr doirasida talabalikka tavsiya etilgan talabgorlarning yakuniy ro'yxatini shakllantiradi. Bunda, bir mutaxassislikka 15 (o'n besh) nafardan kam talabgor talabalikka tavsiya etilgan taqdirda, ushbu mutaxassislikka o'qishga qabul amalga oshirilmaydi.

5-bob. Apellatsiya shikoyati

40. Talabgor saralash natijalari yuzasidan ular e'lon qilingandan so'ng 3 (uch) ish kuni muddat ichida Qabul komissiyasiga o'zining shaxsiy kabineti orqali appellatsiya shikoyatini (ariza) yuborishi mumkin. Ushbu muddat Qabul komissiyasi tegishli qarori bilan o'zgartirilishiga yo'l qo'yiladi.

41. Apellatsiya shikoyati Qabul komissiyasi tomonidan belgilangan tartibda ro'yxatga olinadi, 5 (besh) ish kuni ichida ko'rib chiqilib, tegishli qaror bilan rasmiylashtiriladi va o'sha kunning o'zida talabgorga uning shaxsiy kabineti orqali xabar beriladi.

42. Talabgorning shikoyati (arizasi) qanoatlantirilgan taqdirda saralash natijalari qayta ko'rib chiqiladi va unga tegishli o'zgartishlar kiritiladi. Qabul komissiyasining ushbu qarori yakuniy hisoblanadi.

6-bob. Yakunlovchi qoidalar

43. Mazkur Nizomga o'zgartirish va qo'shimchalar Universitet rektorining tegishli buyrug'i asosida kiritiladi, ushbu Nizomda belgilangan holatlar bundan mustasno.

44. Mazkur Nizomni qo'llashda yuzaga keladigan nizolar qonunchilik hujjatlarida belgilangan tartibda hal etiladi.

45. Mazkur Nizom talablarining buzilishida aybdor bo'lgan shaxslar qonunchilik hujjatlariga muvofiq javobgarlikka tortiladi.

Al-Xorazmiy universitetiga
2026/2027 o'quv yili uchun magistratura
mutaxassisliklariga talabalarni
qabul qilish tartibi to'g'risidagi nizomga

1-ilova

**Hujjatlarni topshirish, ularni ko'rib chiqish va qabul qilish,
saralash jarayonlarini tashkil etish hamda o'qishga qabul qilish**

SXEMASI

Bosqichlar	Mas'ullar	Tadbirlar	Muddat
1-bosqich	Talabgor	1. Qabul shartlari, huquq va majburiyatlar hamda Qabul komissiyasi vazifalari bilan tanishganlik to'g'risidagi ommaviy ofertani tasdiqlash. 2. Elektron platformada shaxsiy kabinet ochish. 3. Elektron platforma orqali zaruriy ma'lumotlar va hujjatlarni taqdim etish.	2026-yil 30-martdan 21-avgustga qadar
2-bosqich	Ishchi guruh	Talabgorlar tomonidan topshirilgan hujjatlarni ko'rib chiqish, qabul qilish yoki rad etish, shuningdek ko'rib chiqish natijasi yuzasidan talabgorga xabar yuborish.	5 ish kuni mobaynida
3-bosqich	Talabgor	Hujjatlarni topshirishda aniqlangan kamchiliklarni bartaraf etish.	2 ish kuni mobaynida
4-bosqich	Ishchi guruh	Saralash natijalarini talabgorning shaxsiy kabinetiga joylashtirish.	2026-yil 5-sentabr
5-bosqich	Ishchi guruh	Talabgorlarning shaxsiy kabineti orqali shartli ofertani yuborish.	saralash natijalari e'lon qilingan kundan boshlab 5 ish kuni mobaynida
6-bosqich	Talabgor	Shartli oferta asosida kafolat to'lovini to'lash.	5 ish kuni mobaynida
7-bosqich	Ishchi guruh	Parametr doirasida talabalikka tavsiya etilgan talabgorlarning yakuniy ro'yxatini shakllantirish.	o'quv yilining birinchi 5 (besh) ish kuniga qadar

Al-Xorazmiy universitetiga
2026/2027 o'quv yili uchun magistratura
mutaxassisliklariga talabalarni
qabul qilish tartibi to'g'risidagi nizomga
2-ilova

Matematikaga oid bali asosida saralash natijasi taqdim etiladigan xalqaro sertifikatlar

RO'YXATI

Talabgorning xalqaro sertifikat bo'yicha to'plagan bali	Saralash jarayonida taqdim etiladigan ko'rsatkich (foizda)
I. "Graduate Management Admission Test (GMAT 10th Edition)" sertifikati bo'yicha	
50-51	100
48-49	95
46-47	90
44-45	85
42-43	80
40-41	75
38-39	70
36-37	65
34-35	60
32-33	55
30-31	50
28-29	45
II. "Graduate Management Admission Test (GMAT Focus Edition)" sertifikati bo'yicha	
89-90	100
87-88	95
85-86	90
83-84	85
81-82	80
79-80	75
77-78	70
75-76	65
73-74	60
71-72	55

Talabgorning xalqaro sertifikat bo'yicha to'plagan bali	Saralash jarayonida taqdim etiladigan ko'rsatkich (foizda)
69-70	50
67-68	45
III. "Graduate Record Examination (GRE)" sertifikati bo'yicha	
169-170	100
167-168	95
165-166	90
163-164	85
161-162	80
159-160	75
157-158	70
155-156	65
153-154	60
151-152	55
149-150	50
147-148	45

Al-Xorazmiy universitetiga
2026/2027 o'quv yili uchun magistratura
mutaxassisliklariga talabalarni
qabul qilish tartibi to'g'risidagi nizomga

3-ilova

**Ingliz tilini bilish darajasini belgilovchi milliy va xalqaro tan olingan
sertifikatlar**

RO'YXATI

T/r	Mutaxassislik nomi	Sertifikat nomi		
		IELTS	TOEFL iBT**	Bilim va malakalarni baholash agentligi tomonidan beriladigan chet tilini bilish darajasi to'g'risidagi sertifikat***
1.	Amaliy sun'iy intellekt	6	60	B2 (56–60)
2.	Biznesni boshqarish	6	60	B2 (56–60)
3.	Amaliy lingvistika va TESOL (Ingliz tilini boshqa tillarda so'zlovchilarga o'qitish)	6	60	B2 (56–60)

* qayd etilgan ko'rsatkichlar minimal ko'rsatkichlar hisoblanadi;

** "TOEFL iBT Home Edition" sertifikati qabul qilinmaydi;

Al-Xorazmiy universitetiga
2026/2027 o'quv yili uchun magistratura
mutaxassisliklariga talabalarni
qabul qilish tartibi to'g'risidagi nizomga

4-ilova

**Ingliz tilini bilish darajasini belgilovchi milliy va xalqaro tan olingan
sertifikatlar o'rtasidagi muvofiqlik darajasi**

RO'YXATI

“Common European Framework of Reference” (CEFR) shkalasi bo'yicha ko'rsatkich	Bilim va malakalarni baholash agentligi tomonidan beriladigan chet tilini bilish darajasi to'g'risidagi sertifikat ko'rsatkichlari	“IELTS” ko'rsatkichlari	“TOEFL iBT” ko'rsatkichlari
C2	—	9	118
	—	8,5	115
C1	73–75	8,0	110
	69–72	7,5	102
	65–68	7,0	94
B2	61–64	6,5	79
	56–60	6,0	60